

Glosar novih autora

SAFET BANDŽOVIĆ, doktor istorijskih nauka, naučni saradnik na Institutu za istoriju u Sarajevu, rođen 1961. u Novom Pazaru, postdiplomski studij završio na Univerzitetu u Beogradu, doktorirao 2002. na Filozofskom fakultetu u Sarajevu. Bavi se istraživanjima migracija i društvenih odnosa u novijoj istoriji južnoslovenskog i balkanskog prostora. Autor je 9 knjiga (*I seljavanje Muslimana iz Sandžaka*, Sarajevo 1991., *Ratna tragedija Muslimana 1941-1945*, Novi Pazar 1992., *Iskušenja historije*, Novi Pazar 1993., *Ratne tragedije Muslimana*, Novi Pazar 1993., *Slovo otpora*, Novi Pazar 1994., *Sandžački zapisi*, Novi Pazar 1994., *Sandžačke teme*, Novi Pazar 1996., *I seljavanje muslimanskog stanovništva iz Srbije i Crne Gore tokom XIX stoljeća*, Sarajevo 1998., *Kameni svjedok*, Novi Pazar 1999.), priredio je dva priručnika (*Sandžak i Bošnjaci-Muslimani - Prilog bibliografiji radova o Sandžaku i Bošnjacima-Muslimanima u Sandžaku*, drugi priređivač S. Kačar, Novi Pazar 1994. i *Sandžak. Historija i činjenice*, drugi priređivač S. Kačar, Novi Pazar 1994.), recenzent je više knjiga i samostalnih izdanja, te autor nekoliko stotina prikaza i osvrtâ, predgovora i pogovora, novinskih i publicističkih radova koje je objavio u raznim listovima i časopisima.

ZORAN HADŽIAHMETOVIĆ, doktor medicinskih nauka, opći hirurg – traumatolog, zaposlen na Kliničkom centru Univerziteta u Sarajevu, rođen 1953. godine, medicinski fakultet, postdiplomski studij i doktorat završio u Sarajevu, za višeg asistenta na predmetu Hirurgija i Ratna kirurgija Medicinskog fakulteta u Sarajevu izabran je 1992. godine, a za docenta 1997. godine. Boravio je na usavršavanjima u više univerzitetskih centara u inozemstvu. Godine 1991. prakti-

cirao je na klinikama u Bazelu i Bernu, gdje svoje interesiranje usmjerava ka artroskopskoj hirurgiji koljena kod čuvenih: profesora W. Mullera, H.U. Staublija i R. Ganza. Dolaskom u Sarajevo, prvi uvodi artroskopske operativne zahvate. Rat provodi u Sarajevu gdje je kao hirurg maksimalno involviran u najteže i najkompletnije operativne zahvate ranjenika. U nedostatku osnovnog materijala primjenjuje originalne tehnike fiksacije strijelno-eksplozivnih rana, uz korištenje vlastitih vanjskih fiksatora "Satra" i "Koševo". Nakon rata stečeno iskustvo u rješavanju defekata prezentira kao gostujući predavač na klinikama u Italiji, Španiji i Njemačkoj. Aktivni je sudionik edukacijskog kursa iz urgentne hirurgije 1998. godine na Univerzitetskoj bolnici Kasr El Aini (Kairo, Egipat). Učestvovao je i na mnogim domaćim i inozemnim simpozijima i kongresima sa područja hirurgije, traumatologije, ortopedije i urgentne medicine. Do sada je objavio i prenetirao kao autor ili koautor 58 radova sa područja koštano-zglobne hirurgije.

ALADIN HUSIĆ, istraživač osmanista, magistar historijskih nauka, rođen je 1963. godine u mjestu Dub, općina Travnik. Gazi Husrev-begovu medresu u Sarajevu završio je 1983. godine, a studij orijentalistike i historije na Filozofskom fakultetu u Prištini. Magistrirao je na Filozofskom fakultetu u Sarajevu - odsjek historija 16. 02. 2004. godine. Kraće vrijeme radio i turskoj firmi KOMBOS u Sarajevu, zatim kao profesor historije u Gazi Husrev-begovoj medresi, kustos u Historijskom muzeju BiH, a od 2003. uposlen je u Orijentalnom institutu, gdje radi i danas kao istraživač-osmanista. Bavi se historijom Bosne i Hercegovine pod osmanskom vlašću (15. - 18. sto-



Meša Bajrić, kupačica, mezotinta, Gračanica, BiH

ljeće). Učestvovao je na nekoliko međunarodnih skupova. Sarađivao je i objavljivao u više naučnih, stručnih i drugih časopisa, publikacija i listova: *Prilozi za orijentalnu filologiju* (Orijentalni institut-Sarajevo) *Prilozi* (Institut za istoriju-Sarajevo), *Anali* (Gazi Husrev-begova biblioteka - Sarajevo), *Hercegovina* (Mostar) itd. Koautor je udžbenika *Historija za 7. razred*, *Historijske čitanke i Radne sveske za 7. razred*, objavljenih 2003. godine.

KASIM MUMINHODŽIĆ, redovni profesor Medicinskog fakulteta u Tuzli, doktor medicinskih nauka, rođen je 1941. godine u Lukavcu, Medicinski fakultet završio u Beogradu, specijalizaciju interne medicine u Tuzli i Beogradu, specijalizaciju iz gastrologije na Sveučilištu u Zagrebu, gdje je završio i postdiplomski studij iz gastroenterologije, a specijalizaciju iz endoskopije u Kliničkom centru u Ljubljani. Doktorirao je na Medicinskom fakultetu u Tuzli, gdje radi kao redovan profesor i šef Katedre za internu medicinu, predsjednik je Udruženja gastroenterologa Bosne i Hercegovine. Učesnik je više svjetskih kongresa i drugih naučnih skupova, autor je 70 stručnih radova koje je objavio u raznim stručnim i naučnim

publikacijama i časopisima, koautor knjige *Interna medicina* koja se koristi kao udžbenik na medicinskim fakultetima i koautor knjige *Akutna abdominalna bol*, koja je izašla ove godine u Sarajevu.

MEHMED NURIKIĆ, profesor bosanskog jezika i književnosti, rođen je 1947. godine u Odžaku, Filozofski fakultet završio u Sarajevu. U studentskim danima jedno kraće vrijeme sarađivao u omladinskom listu "Spektar". Od 1972. godine živi i radi u Gračanici kao profesor Gimnazije. U svom dugogodišnjem pedagoškom radu, posebno se isticao u radu sa mladim u novinskoj redakciji (osnivač i urednik školskih listova *Sred-*

njoškolac i *Gim*) i literarnoj sekciji gimnazije *Trofonda* (zbirka dačke poezije *Ruža, stablo ili nešto treće*). Bavi se književnom kritikom i stilistikom, te radom sa mladim književnim talentima, urednik je ili recenzent više zbirki poezije i proze, književnih prikaza i predgovora. U ratnim uslovima, u toku 1993. i 1994. godine bio je glavni i odgovorni urednik općinskog lista "Biljeg vremena".

ABDULKADIR ŠIŠIĆ, ljekar specijalista, rođen 1951. godine u Tuzli, gimnaziju završio u Gračanici, Medicinski fakultet, 1976. godine u Sarajevu, od kada je stalno zaposlen u Domu zdravlja Gračanica, specijalizirao fizikalnu medicinu i reumatologiju, stekao zvanje primarijusa. Predmet interesovanja mu je dječja rehabilitacija i pojedine oblasti reumatologije, posebno osteoporoza. U posljednjih pet godina formirao je bazu podataka o pacijentima koji boluju od te bolesti, a bavio se i ljekovitim svojstvima gračaničkih termomineralnih voda. Objavljivao je radove u stručnim časopisima, učestvovao na raznim stručnim skupovima i kongresima u zemlji i inostranstvu, angažovan je u dva kanadska i jednom američkom naučno-educativnom projektu.